

# 中華名勝古蹟

## 第一編 直隸

### 一 北京

北京本古幽燕地。南襟河洛。北枕居庸。滄澗環其東。太行擁其西。負山引河。縈畿帶甸。形勝甲天下。據高屋建瓴之勢。誠所謂神皋奧區。天府之國也。其都城始於遼金。擴大於元明。明永樂元年。拓地營建。規模宏展。前清入關。據以爲都。二百餘年中。土木屢興。於是宮殿之壯麗繁華。視秦之阿房。漢之未央。殆又過之。民國締造。清帝遜位。凡乾清門以內。卽所稱爲紫禁城者。仍爲清帝所居。中海則爲大總統府。南海則爲副總統府。國務院亦設於是。遂定北京爲中華之國都。

### 太液池

前清內苑三海。總稱曰太液池。南北亘四里。東西二百餘步。池水導玉泉山之水以瀦成者。波光澄澈。清碧堪鑑。列京師八景之首。名曰太液清波。西苑有橋曰金鰲玉蝀。橋之北曰北海。南曰中海。在瀛臺以南者曰南海。花木掩映。風景絕佳。而以北海爲尤勝。

金鰲玉蝀橋

橋廣二丈。長數百步。其兩端有巨坊對峙。西曰金鰲。東曰玉蝀。欄楯皆白石。飾以雕鏤。工巧絕倫。橋洞凡九。蔽以鐵柵。橋旁有額曰銀潢作界。有聯曰玉宇瓊樓天上下。方壺員嶠水中央。蓋紀其實也。

承光殿

殿在團城之中。爲元時儀天殿舊址。清康熙時所重建者。四圍花木亭榭。境界幽靜。

玉甕亭

承光殿之南。有一亭焉。中置玉甕。甕徑約四尺。深三尺許。爲元至元二年遺物。其花紋作魚龍出沒波濤狀。靈活凸起。雕刻絕工。相傳此甕得之於一小肆中。肆人用以貯藏菜蔬者。其售價僅十元云。然按鄭希文玉甕歌中有嗚呼隱見會有遇。委棄道院歲已多。冬蔬實腹泥沒足。學士憑吊資吟哦等句。則其甕當不在小肆而在道院中矣。惜未詳道院之名及所在地。亭外有檜樹一章。姿勢奇古。枝幹挺拔。清高宗有古檜行云。徒聞金元飾棟宇。兩人並坐傳齊諧。蓋金章宗嘗携李宸妃待月於樹下。章宗偶與妃戲。以二人土上坐。命妃屬對。妃卽以一月日邊明對之。章宗不勝嘆服。故歌中云然。

### 瓊華島

瓊島之名。創於金代。一名萬壽山。又名大山子。清高宗曾御製碑文。以紀其所由始。島兀立水中。多怪石。相傳爲宋艮嶽之遺。自汴移來者。巖石玲瓏。峯巒隱映。松檜隆鬱。秀若天成。爲京師八景之一。名曰瓊島春雲。每當春雨初

晴。魚鱗疊起。霧縠新妍。霞裳艷媚。丹崖瑞景。碧嶂晴氛。令人心胸縹緲。五蘊皆空。洵絕勝處也。

### 白塔

瓊華島之最高處。有一塔。名曰白塔。高十餘丈。圍八九丈。亦巨觀也。塔下方上圓。頂矗起。有金色之環罩之。下層有木門。上有符錄。蓋其內有寶物存也。山下有石碑。其文云。有喇嘛僧瑠木汗者。請以佛教佐治。清雍正帝從其請。耗金錢五萬二千餘。建此白塔。爲喇嘛唸經之所。

### 闕古樓

樓凡五楹。梁柱皆髹朱。其梯之製。極爲奇異。中立一柱。繞柱爲級。旋轉而登之。樓之三面皆迴廊。壁間砌石碑。凡四百餘方。卽所謂御刊三希堂帖也。樓後臨水。景物絕佳。

### 倚晴樓